

ուօք գնալ 'ի կամենից, և այդ վաթսուն վերստը՝ անհնարին ցեխին պատճառաւ՝ երբեմն հարկ կը լինի օրերով ճամբայ մնալ, անձրևի ներքոյ։ Օդոյն անհարթութեանց դէմ ևս՝ ճանապարհի լաւ պատըսպարութիւն չունենալով, խոհեմութիւն համարեցայ ուրիշ յարմար միջոցի թողուլ 'ի կամենից ճանապարհորդութիւնս, և ուղղեցի ընթացքս յՕտեսաս և անտի 'ի Թէոգոսիա։

Հարկ եղաւ սպասել այլ ևս եօթը տարի և ահա այս ամառ (1883) ամսօրեայ արձակուրդ և անցագիր, միանգամայն և յանձնարարական նամակ մի տանելով, առ տեղական վարչութիւնս 'ի կամենից և 'ի Քիէվ, 'ի կողմանէ Արքունի հնագիտական ընկերութեան Օտեսասայի, օգոստոսի ամսոյն 14ին, երեկոյեան շոգենաւով ճամբայ ելայ 'ի Թէոգոսիոյ՝ յուխտապնացութիւն առ Տիրամայրն Հայոց 'ի կամենից։

Օգոստոս 16 թէպէտ Ռուսաստանի համար աչունք է, այլ Ղրիմու համար գեռ ամառն. սակայն այն օրը՝ կարծես Ռուսաստանի աչունք կը շնչէր. խոնաւ էր օդն, մութ և անլուսին գիշեր, աստղերն՝ իբրև աղօտ լապտերներ շարուած էին երկնից կապոյտին վրայ, և 'ի խոնարհ դէպ 'ի հօրիզոն՝ քաղաքիս տանց ճրագներուն խառնուելով, շարունակութիւն կը գործէին երկնաւոր լոյսերը՝ երկրաւորաց, և երկոցունց անդրադարձութիւնը 'ի ծովուն՝ երրորդ շարք մի էր լուսերու. սակայն և այնպէս՝ այս երեք կարգ լոյսերն միանալով՝ չէին բաւական գիշերուան մթութիւնը ոչ միայն փարատելու, այլ և ոչ մեղմելու։ Մութ գիշերն՝ մութ մութ խորհուրդներ կը յարուցանէր մտացս մէջ։ Մերձաւորաց, բարեկամաց հրաժարականս տալով՝